

MKPE-UBỌK MOSES NDIYOM ISO ABASI

Exodus 33:1-23

ỌYỌHỌ UKPEP-ŃKPỌ 68

Eke Mkparawa

IKỌ IBUOT: “Ama edi esit eke eberede (Fi), Afo eyekpeme enye ke emem emem” (Isaiah 26:3).

Uñwam Iduhe Ke Ebede Abasi

Ke ini akwa otu nditọ Israel eketọñde isañ mmọ ndika isọñ eñwọñ, mmọ ikọdiọñke usuñ. Mmọ ikọdiọñke ebiet eke ekemede ndikut udia nọ idem mmọ ye mme ufene mmọ, me ebiet eke ediñwọñ mmọñ odude. Abasi mikpoduhe ndiñwam mmọ, mmọ ekpekpaña usọp-usọp ke akwa akai-ikọt.

Toto ke eritọñ isañ mmọ, Abasi ama ebem mmọ iso oto ke obubit enyọñ ke uwemeyo ye ke adaha ikañ ke okoneyo. Mmọ ema efiọk ete ke Abasi ama odu do koro Enye eketiñde ikọ ọnọ Moses ke obubit enyọñ oro, kpukpru mmọ ema enyuñ ekut ubọñ Esie (Exodus 16:10-12).

Ubọñ Abasi Ke Obot

Adaha oro ama ada mmọ usuñ osim ke Obot Sinai, ebiet emi nditọ Israel ekenamde nna ke ekpri ini. Do ke Abasi akayarade idem ke ubọñ ye odudu, ke ufọt obuma, emireñ-mireñ ye unyek-isọñ; ndien do ke ukorowo Abasi okosioro uyo oduri okot mme owo esaña ekpere obot man ekop mme ibet Esie. Mmọ ema ekop uyo Esie, enyuñ efiọk se mme ikọ emi Enye eketiñde ewọrọde; edi, ke ufọt usen aba, mmọ ema enam eyen-enañ enọ idem mmọ ndida itie ata ọkpọsọñ Abasi emi odude ke Heaven. Ke kpukpru idaha, Abasi ama enen ke ndiyom ndisobo utọ mbio ukpono-ndem ye mme anana esit-ekọm emi. Kere baña akwa mbọm emi Abasi enyenede ke ndiyak mmọ eka iso edu uwem oto ke ibọrọ akam Moses!

Abasi Akañ Ikọt Esie

Ke ini emi Abasi ọkodọhọde Moses ke obot ete ke nditọ Israel ke enam idiọk-ńkpọ, Enye ete: “Suhọre, nyọñ; koro oruk fo, emi afo akadade ke isọ Egypt ọwọrọ, emebiara” (Exodus 32:7). Abasi ikenyimeke ndida mme anam-idiọk oro nte ikọt Esie, ndien ke nditiñ mbaña mmọ nọ Moses, okot mmọ “oruk fo.”

Nnyin ikemeke ndidi nditọ Abasi edieke inyenede idiọk-ńkpọ ke uwem nnyin. Ke ima iyarade mme idiọk-ńkpọ nnyin inyuñ iwọñorede ikpọñ mmọ, ndien ibọ erifen ke ubọk Jesus, nnyin imamana iduk ke ubon Abasi; edi edieke ifiakde inam idiọk-ńkpọ, nnyin idighe aba nditọ Esie. Jesus eketiñ ọnọ mme Jew ke ini mmọ ekenamde idiọk-ńkpọ ete ke Satan edi ete mmọ (John 8:44). Abasi akada John usuñ ndiwet: “Eda emi eyarade efiọk nditọ Abasi ye nditọ Satan; baba owo kiet eke minamke edinen ido idighe eke Abasi, ndien edi ntre ye owo emi mimaña eyen-ete esie” (1 John 3:10). Imokut ite se ikpekerede nte edi ńkpri idiọk-ńkpọ, nte editre ndima eyen-ete nnyin, eyesio nnyin efep ke ubon Abasi onyuñ anam nnyin idi nditọ Satan.

Emen Ufọk-ọfọñ Ekpọñ Nna

Abasi ama enyene mbọm abaña Israel ke ini mmọ ema ekekabare esit, ikonyuñ isoboke mmọ kpukpru; edi Enye ọdọhọ ete ke Imọ idikemeke ndiduñ ke otu mbon nsọñ-ibuot oro. Moses ama enyene ufọk-ọfọñ, do ke enye okosobo ye Abasi onyuñ atuak ibuot, emi enye ekemende ke emi ọkpọñ nna anyan ebiet. Enye okosio enye enyiñ Ufọk-ọfọñ Esop. Do ke Moses akaka ndinam mkpe-ubọk nọ otu owo, ndien do ke Abasi okosobo ye enye ke adaha obubit enyọñ. Owo ekededi ke otu nditọ Israel emi ekenyenede udọñ ndikpono Abasi ama enyene unen nditiene enye ńka do. Ke ini mmọ emi ekedude ke mme ufọk-ọfọñ mmọ ekutde adaha nte ọsuhọrede edidoro ke ufọk-ọfọñ, nte idiọñ nditọñ nta nda mfọnido Esie ntiene mmọ, mmọ ema edaha ke enyọñ etuak ibuot.

Abasi Aduak Ndinọ Angel Nte Ada-usuñ

Abasi ama enyene mbọm ọnọ Israel, edi Enye ama ọfiọk ete ke mmọ iditreke nditọñ nta nnam idiọk-ńkpọ, ndusuk ke ini efen Imọ idinyeneke mbọm ndien eyesobo kpukpru mmọ. Ke ntre Enye ete ke Imọ iyenọ angel ada mmọ usuñ, koro Enye ke Idemesie midisañake ye mmọ.

Nnyin iyekpep ke ini iso nte Abasi ọkọdọñde idiọk uruk-ikọt okodom nditọ Israel ke ini mmọ ekenamde idiọk-ńkpọ, ndien kpukpru mmọ emi uruk-ikọt ekedomde ema ekpaña. Ke ini efen ikañ emi otode Abasi ama obubere asak ke nna onyuñ ata ediwak owo oto ke nta mme idiọk-ńkpọ mmọ (Numbers 11).

Mkpe-ubọk Moses

Esit ama ọbuñọ Moses ke enye ekerede nte Abasi midisañake ye mmọ. Moses ikekereke ite ke iyekeme ndida akwa idut oro usuñ ikosim Isọñ Eñwọñ ibọhọke Abasi odu ye ńkañ esie ndinọ uñwam. Ke akpa ini Moses okoyomde ndiñwam oruk esie ke Egypt, enye okodomo ke odudu esie, ama onyuñ okut ete imanam se mifọnke. Ke enye okodomode ndinam emem ke ufọt nditọ Hebrew iba, mmọ efiọri, “Anie odori fi ete edi ọbọñ ye ebriere-

ikpe ke otu nnyin?” Moses ama ada ukpep-ñkpọ do ete ke imọ ikemeke ndinam ñkpọ ekededi ke esiode uñwam Abasi efep, ke ntre enye ebeñe ete yak iso Abasi aka ye imọ, midighe ntre imọ ididomoke ndida mmọ usuñ ndaha mkpọñ ebiet oro.

Nnyin Imoyom Iso Abasi

Ndusuk owo emi etọñode nditiene Christ obufa eneñere enyene iberedem mmọ ke Ọbọñ ke editọñ, edi ke akade iso esisit mmọ ekere ete ke imekeme ndisaña ofon ke idem mmimọ ikpọñ. Mmọ ibọñke akam aba nte akpa ini emi mmọ ekemanade obufa, mmọ inyuñ ibiatke ini aba ke edikot Ñwed Abasi, nte ada-usuñ emi Abasi, ọñode ndiñwam anditiene-Christ ndidu eti uwem. Suñ-suñ mmọ efiak edem ekpọñ Abasi. Edi ke ini afañikọñ ọwọrọde ọnọ mmọ, mmọ edighe efiok ete ke idu ikpọñ, ntak odu ndien ndiyom Abasi ke mkpa ye uwem edi Enye oyom usuñ ọkpọñ mmọ. Moses ikoyomke ndikut idemesie ke ọkpọsọñ ebiet eke Abasi esie edidade ko nsan-nsan ye enye. Enye ọdọhọ ete: “Iso Fo mikaha, kunam nnyin idaha ke ebiet emi idok.”

Emi ekpedi uduak kpukpru mme anditiene-Christ. Ikpanaha nnyin ika ebiet ekededi eke Ọbọñ miditieneke nnyin ika, nnyin ikpetiñke ikọ ekededi eke nnyin miyomke Enye okop. Ana nte nnyin ikpep Ikọ Abasi inyuñ ibọñ akam inọ Jesus tutu nnyin ifiok ite ke Enye odu ke ñkañ nnyin kpukpru ini.

Moses eneme ye Abasi ete: Didie ke mme isen idut edifiok ete ke mbio emi ekedi ikot Abasi edieke iso Esie misañake ye mmọ? Didie ke mme owo efiok mmọ emi edide nditọ Abasi mfin? Mmọ ekeme ndidiọñ ata anditiene-Christ nto ke Spirit emi oduñde ye enye. Otu ekeme ndiboho ke enyiñ Jesus, edi ke idiok-ñkpọ odude ke esit mmọ Spirit Abasi ididuhe ye mmọ. Ukpono Abasi mmọ onyuñ edi ikpikpu edinam. Enye emi minimke Abasi ke akpanikọ ekeme ndise utọ mmọ emi onyuñ ọdọhọ ete ke uwem imọ etie ukem-ukem nte eke mmọ.

Ebiet Eke Spirit Oduñde

Didie ke ukpuhọre odu ke otu emi Spirit Abasi odude. Ima ye edidiana-kiet odu ke otu nditọ-ete koro Iyip Jesus ama anam mmọ edi kiet; odudu mmọdo ndibọñ akam mbuqtidem eke edikokde owo udọñ; Edisana Spirit etiñ ubiomikpe esin ke esit anam-idiok emi oyomde ubọhọ onyuñ añwam enye ndibọ erinyaña ukpọñ. Abasi odu do! Ekeme ndikop Edisana odudu Esie. Mme ikwọ itoro edemere, eto ke mme esit emi efiokde Abasi. Enọ etop Ikọ Abasi ke ido eke midipke idiok-ñkpọ onyuñ ekpepde mme owo usuñ emi akade Heaven. Ndien mme idiọñ Ñwed Abasi etiene mmọ emi enimde ke akpanikọ (Mark 16:17, 18).

Ofon adaña didie iso Abasi ndidu ye nnyin! Spirit Esie oduñ ye nditọ Esie emi emanade obufa; ke ini enamde mmọ esana, Spirit oyọhọ mmọ ke idem akan eke akpa; ndien ke ini mmọ ebode uduok- mmọñ Edisana Spirit, ukpọñ mmọ oyọhọ ọduọhọ ye aran idaresit oro, ikañ ima Esie. Mmọ ebọ odudu ye uduok-mmọñ Edisana Spirit man eda enam utom emi oñwumde mfri ọnọ Ọbọñ. Spirit oro odu ye nnyin adaña nte idude uwem inọ Abasi inyuñ ikade iso ke ebuana nnyin ye Ọbọñ ke usen ke usen.

Uñwana Ererimbot

Ererimbot ke ọdọdiọñ ọkọri ke ekim oto ke ntak idiok-ñkpọ mme andiduñ ke esit. Jesus edi ñkukure Uñwana esie. Ke ntre Spirit ke idem nditọ Esie, nte mme andikama uñwana, edi uñwana emi adade mme owo ọsok Andinyaña. Oro edi ntak emi edide akpan-ñkpọ nnyin ndinyene Spirit Abasi uwak-uwak ke esit nnyin nte ikekeme man oto do nnyin ikpekeme ndiyama nnyuñ ñwut mme anam-idiok usuñ ndisaña nsim ke Ubọñ.

Moses Akan

Abasi ama ọbọrọ akam Moses onyuñ onyime ndika ye enye. Ndien Moses ebeñe mme ikpọ edidiọñ: enye okoyom ndikut ubọñ Abasi. Idahaemi, baba owo kiet ikemeke ndikut iso Abasi ñtọñ ntak ndu uwem ke obukidem enye emi. Enye odip Moses ke aba itiat onyuñ ada ubok Esie ofuk enye. Do ndien Enye asaña ebe onyuñ ayak Moses okut edem Esie ikpọñ. Udọñ odu ke esit ata anditiene-Christ ndikut Jesus; nnyin imadara ke udomo ubọñ Esie eke Enye ayakde nnyin ikut. Ke ini nnyin isimde Heaven, nnyin iyekut Enye nte Enye etiede. “Ndima, nnyin idi nditọ Abasi ke emi; ndien iyarakere kaña iwut se nnyin ididide. Edi nnyin ifiok ite, edieke Enye ediwọrọde owut idem nnyin iyebiet Enye, koro nnyin iyekut Enye nte Enye edide” (1 John 3:2).

MME MBUME

1. Anie akada nditọ Israel usuñ ọwọrọ ke Egypt aka ke Sinai?
2. Didie?
3. Nso idi ntak emi Abasi ekesinde ndikot nditọ Israel nditọ Esie?
4. Ini ewe ke nnyin idi nditọ Abasi?
5. Didie ke mme esen idut ekenyene ndifiok ete ke Israel ekedi ndimek ikot Abasi?
6. Didie ke mme owo efiok ete ke nnyin idi nditọ Abasi?